

Centralna banka Bosne i Hercegovine i Narodna banka Srbije, izražavajući obostrani interes i volju da uspostave sistem koji će omogućiti efikasniji, brži i jeftiniji platni promet između fizičkih i pravnih lica s teritorije Bosne i Hercegovine i Republike Srbije, sporazumjele su se da zaključe

S P O R A Z U M O KLIRINGU MEĐUNARODNIH PLAĆANJA

Član 1.

U smislu ovog sporazuma:

- 1) *centralne banke* su Centralna banka Bosne i Hercegovine i Narodna banka Srbije (u daljem tekstu: sporazumne strane);
- 2) *učesnici u kliringu* su pravna lica koja obavljaju bankarske poslove, koja po propisima države u kojoj su osnovana imaju status banke ili druge finansijske organizacije, koja posjeduju dozvolu za rad i kontrolisana su u skladu sa zakonom države u kojoj su osnovana i koja su s centralnom bankom svoje države zaključila ugovor o učešću u kliringu međunarodnih plaćanja;
- 3) *kliring međunarodnih plaćanja* je prijem pojedinačnih naloga za plaćanje ili grupe naloga za plaćanje uz koje se dostavlja specifikacija pojedinačnih naloga, radi obračuna multilateralnih neto iznosa za poravnanje koji se obavlja na obračunskim računima centralnih banaka i banaka (u daljem tekstu: kliring);
- 4) *operater kliringa* je Narodna banka Srbije;
- 5) *zbirna neto pozicija centralne banke* jeste razlika između svih primljenih i izvršenih plaćanja svih učesnika u kliringu koji s tom centralnom bankom imaju zaključene ugovore o učešću u kliringu;
- 6) *neto pozicija učesnika u kliringu* u određenom trenutku jeste razlika između primljenih i izvršenih plaćanja za tog učesnika, računajući od početka klirinškog ciklusa do tog trenutka.

Član 2.

Sporazumne strane su saglasne da se kliring obavlja preko operatera kliringa i u skladu sa Operativnim pravilima za kliring međunarodnih plaćanja (u daljem tekstu: Operativna pravila), koja su sastavni dio ovog sporazuma i propisima država sporazumnih strana.

Član 3.

Sporazumne strane su dužne da obavještavaju operatera kliringa o iznosima limita neto pozicija učesnika u kliringu sa svoje teritorije za čije izvršenje one garantuju, u skladu sa Operativnim pravilima.

Ako jedna od sporazumnih strana učesniku u kliringu odobri promjenu limita, a operateru kliringa ne dostavi informaciju o odobrenju te promjene prije početka tekućeg obračunskog dana – limitom tog učesnika smatra se limit iz prethodnog obračunskog dana.

Član 4.

Operater kliringa je dužan da, poslije isteka vremena za prijem poruka utvrđenog Operativnim pravilima, obavještava sporazumne strane o zbirnim neto pozicijama iz kliringa, kao i o neto pozicijama učesnika u kliringu, a sporazumne strane obavještavaju operatera kliringa o tome da su saglasne da se te neto pozicije izvrše.

Član 5.

Sporazumne strane su saglasne da se računi učesnika u kliringu odobravaju i zadužuju za iznos pozicija iz kliringa ovih učesnika, u skladu sa ugovorima koje su zaključile s tim učesnicima.

Član 6.

Operater kliringa se obavezuje da, poslije prijema saglasnosti sporazumnih strana u skladu sa Operativnim pravilima, izvrši obračun i svakom učesniku u kliringu dostavi izvod njegovog obračunskog računa za kliring, poslije čega se obračun smatra konačnim.

Član 7.

Sporazumne strane su saglasne da se plaćanje između njih po osnovu zbirnih neto pozicija obavlja preko računa Deutsche Bank AG, F/M.

Član 8.

Sporazumne strane su saglasne da se ovaj sporazum može raskinuti na pisani zahtjev bilo koje sporazumne strane.

Ako jedna od sporazumnih strana ne izvrši obavezu iz ovog sporazuma, druga sporazumna strana može je pisanim putem obavijestiti da raskida ovaj sporazum.

Danom prijema pisanog obavještenja iz stava 2. ovog člana, ovaj sporazum prestaje da proizvodi pravno dejstvo.

Član 9.

Eventualna sporna pitanja u izvršavanju ovog sporazuma, sporazumne strane rješavaće sporazumno. U slučaju spora, nadležan je međunarodni arbitražni sud u mjestu operatera kliringa.

Član 10.

Ovaj sporazum proizvodi pravno dejstvo od datuma kad ga potpišu sporazumne strane.

Član 11.

Sve eventualne izmjene i dopune ovom sporazumu regulisaće se u pisanoj formi, aneksom ovom sporazumu.

Član 12.

Ovaj sporazum je sačinjen u četiri (4) istovjetna primjerka na engleskom jeziku i po dva (2) istovjetna primjerka na jezicima sporazumnih strana, od kojih po dva (2) istovjetna primjerka na engleskom jeziku i po dva (2) istovjetna primjerka na jezicima sporazumnih strana na koje se sporazum odnosi, zadržava svaka sporazumna strana.

U slučaju spora, mjerodavna je engleska verzija sporazuma.

**Za Centralnu banku
Bosne i Hercegovine**

**Za Narodnu banku
Srbije**

**mr Kemal Kozarić
Guverner**

**Radovan Jelašić
Guverner**